

魏
书

第三
函
第八
册



魏書卷九十五

列傳第八十三

匈奴劉聰

羯胡石勒

鐵弗劉虎

徒何慕容廆

臨渭氏苻健

羌姚萇

略陽氏呂光

夫帝皇者配德兩儀家有四海所謂天無二日土無二王者也三代以往守在海外秦吞列國漢并天下逮桓靈失政九州瓦解曹武削平寇難魏文奄有中原於是僞孫假命於江吳僭劉盜名於

岷蜀何則戎方惟髻之帥夷俗斷髮之魁世崇凶德罕聞王道扇
以跋扈忻從放命加以中州避地華士違讎思託號令之聲念邀
風塵之際因虞候隙仍相君長偷名之位舊息一隅至乃指言井
絡假上帝之社妄說黃旗云人君之氣論士不出江漢語地僅接
廢斜而謂握皇符秉帝籍三分鼎立比蹤王者溺人必笑其在茲
乎若是驚靈可擬於周王夫差容比於漢祖尉他定黃屋之尊子
陽成綰璽之貴豈其然哉及鍾會一將之威士治偏師之勢而使
騾車西至侯蓋北首天人弗許斷可知焉晉年不永時逢喪亂異
類羣飛姦凶角逐內難興於戚屬外禍結於藩維劉淵一涓石勒
繼響二帝沈淪兩都傾覆徒何仍爨氏羌襲梗夷楚喧聒於江淮
胡虜叛換於瓜涼兼有張赫山河之閒顧恃遼海之曲各言應曆
數人謂遷圖鼎或更相吞噬迭爲驅除或狼戾未馴俟我斧鉞太

祖奮風霜於參合鼓雷電於中山黃河以北靡然歸順矣世祖叡
略潛舉靈武獨斷以夫僭偽未夷九域尚阻慨然有混一之志既
而戎車歲駕神兵四出全國克敵伐罪弔民遂使專制令擅威福
者西自流沙東極滄海莫不授館於東門懸首於北闕矣唯夫窮
髮遺虜未拔根株徼垂殘狡尚餘栽蘖而北踰翰漠折其肩髀南
極江湖抽其腸胃雖骸骨僅存脂膏咸盡視息纔舉魂魄久遊高
祖聖敬時乘遷居改作日轉雲移風行電掃辮髮之渠非逃則附
卉服之長琛齎繼入猶以侍子不至取亂乘機五牛一指六師騁
路馘其武臣驍帥傾其湯池石城向使時無穀塘之禍民無鼎湖
之思北可焚穹廬收服匿削引弓之左衽苑龍荒以牧馬南則巢
畫甍暴鯨鯢變水處之文身化鳥言於人俗矣尋以壽春內款華
陽稽服叢彼江陰憂於繫頸肅宗以冲年踐祚俄則母后當陽務

崇寬政取和朝野置荒遐於度外譬蠻夷於雞肋而黠狄淪胥種
落離貳虜帥飄然窮而歸我矜其眼目愍厥顛亾反之於故庭復
之以保塞魏道將虧禍出權幸事僻於中民驚於外疆場崩騰藩
籬傾駭陰朔委命之倫雲蒸霧合上失其道下極其難政亂如風
草師亾猶彈九十數年間中區殄悴而江湄巨狡窺覲上國虵虺
肆毒竊我邊鄙氈裘相率馬首南向白山灑水狐鼠羣遊魏德雖
衰天命未改援墜扶危齊武電發屈身宰世大濟橫流和戎略遠
用謀急病輜軒四指喻以德音余乃舟車接次駝驢銜尾烽柝不
警尉候空設而水鄉大猾好利忘信納我逋叛共爲舉斧遂有寒
山之戰渦陽關二字糾合兇楚覆其巢穴衍以餒卒綱實鳩死獯虜
那瓌尋亦殲殪自二百許年僭盜多矣天道人事卒有歸焉猶眾
星環於斗極百川之赴溟海今總其僭偽列於國籍俾後之好事

知僭盜之終始焉

匈奴劉聰字玄明一名載冒頓之後也漢高祖以宗女妻冒頓故其子孫以母姓爲氏祖豹爲左賢王及魏分匈奴之眾爲五部以豹爲左部帥豹雖分屬五部然皆家于晉陽汾澗之濱父淵形容偉壯膂力過人晉初爲任子在洛陽豹卒淵代之後改帥爲都尉以淵爲北部都尉楊駿輔政以淵爲建威將軍五部大都督封漢光鄉侯後坐部民叛出塞免官永寧初成都王穎表淵行靈朔將軍監五部軍事及齊王問長沙王又與穎等自相誅滅北部都督劉宣等竊議反叛謀推淵爲大單于時淵在鄴乃使呼延攸以此謀告之淵請歸會葬穎不許穎爲皇太帝以淵爲太弟屯騎校尉晉惠帝之伐穎也以淵爲輔國將軍都督北城守事及惠帝敗以淵爲冠軍將軍封盧奴伯旣而并州刺史司馬騰幽州刺史王浚

起兵伐潁潁師戰敗淵謂潁曰今二鎮跋扈眾踰十萬恐非宿衛
及近郡士民所能禦之淵當爲殿下還說五部鳩合義眾以赴國
難潁悅拜淵爲北單于參丞相軍事淵至左國城劉宣等上大單
于之號二旬之間眾便五萬都於離石淵謂宣等曰帝王豈有常
哉當上爲漢高下爲魏武然晉人未必同我漢有天下世長恩德
結於民心吾又漢氏之甥約爲兄弟兄亾弟紹不亦可乎今且可
稱漢追尊後主以懷民望乃遷於左國城自稱漢王置百官年號
元熙追尊劉禪爲孝懷皇帝攻擊郡縣桓帝十一年晉并州刺史
司馬騰來乞師桓帝親率萬騎救騰斬淵將綦毋豚淵南走蒲子
語在序紀晉光熙元年淵進據河東尅平陽蒲坂遂都平陽晉永
嘉二年淵稱帝年號永鳳後汾水中得玉璽文曰有新保之蓋王
莽之璽也得者因增淵海光三字而獻之淵以爲己瑞年號爲河

瑞以聰爲大司馬大單于錄尚書事置單于臺於平陽西淵死子
和僭立聰卽和第四弟也殺和而自立聰援臂善射彎弓三百斤
晉新興太守郭頤辟爲主簿任以郡事舉良將爲驍騎別部司馬
齊王冏以爲國中尉出爲左部司馬尋遷右部尉太宰河閒王顥
表爲赤沙中郎將以淵在鄴懼爲成都王穎所害亾奔穎穎甚悅
拜右積弩將軍參前鋒戰事隨還左國淵稱大號拜大司馬封楚
王及僭位年號光興聰遣王彌劉曜攻陷洛陽執晉懷帝改年爲
嘉平聰於是僑奢淫暴殺戮無已誅翦公卿旬日相繼納其太保
劉殷二女爲左右貴嬪又納殷孫女四人爲貴人六劉之寵傾於
後宮聰希復出外事皆中黃門納奏左貴嬪決之其都水使者襄
陵王攄以魚蟹不供將作大匠望都公斬陵以營作遲晚並斬於
東市聰遊獵無度晨出暮歸觀魚於汾以燭繼晝其弟乂及子粲

輿櫬切諫聰怒曰吾豈桀紂幽厲乎而汝等生來哭人也先是劉
琨來告難穆帝親率大眾令長子六脩擊粲等大破之語在序紀
聰與羣臣飲讌逼晉帝行酒晉光祿大夫庾珉等謀以平陽應劉
琨於是害晉帝誅珉等改嘉平爲建元平陽地震聰崇明觀陷爲
池水赤如血赤氣至天有赤龍奮迅而去流星起于牽牛入紫微
龍形委蛇其光照地落於平陽北十里視之則肉長二十步廣二
十七步臭達於平陽肉旁常有哭聲晝夜不止聰惡之劉后產一
蛇一虎各害人而走尋之不得頃之見在隕肉之旁聰遣劉曜攻
陷長安執晉愍帝改建元爲麟嘉其武庫陷入地一丈五尺聰自
去冬至是遂不受朝賀立市於後庭與宮人讌戲積日不醒立上
皇后樊氏樊氏是聰張后之侍婢也時稱后者四人佩皇后璽綬
者七人阿諛曰進貨賄公行後宮賞賜動至千萬有家著進賢冠

犬冠武弁帶綬並昇聰座俄而鬪死宿衛之人無見入者平文二
年聰死

子粲襲位號年漢昌粲荒耽酒色遊蕩後庭軍國之事決於大將
軍靳準準勒兵誅粲劉氏男女無少長皆殺之準自號漢王置百
官尋爲靳明所殺眾降淵族子曜

曜字永明少孤見養於淵頗知書計志性不恆拳勇有膂力鐵厚
一寸射而洞之坐事當誅亾匿朝鮮客爲縣卒會赦得還聰之末
年位至相國鎮長安靳準之誅粲也曜來赴之次於赤壁遂僭尊
號改年光初靳明旣降於曜還都長安自稱大趙曜西通張駿
南服仇池窮兵極武無復寧歲又發六百萬功營其父及妻二塚
下洞三泉上崇百尺積石爲基周回二里發掘古塚以千百數迫
督役徒繼以脂燭百姓嗁哭盈於道路又更增九十尺塚前石人

有聲言慎封其子盾爲南陽王以漢陽十三郡爲國立單于臺於渭城置左右賢王已下皆以雜種爲之曜得黑兔改年爲太和石虎伐曜擊破之遂攻石生於洛陽曜不撫士眾專與嬖臣飲博左右或諫曜怒斬之石勒進據石門曜甫知之解金墉之圍陳于洛西將與勒戰至西陽門麾軍就平師遂大潰曜墜于冰爲石勒將石堪所擒勒囚之襄國尋殺之烈帝元年曜子毗率百官棄長安西走秦州尋爲石勒所滅

羯胡石勒字世龍小字匄勒其先匈奴別部分散居於上黨武鄉羯室因號羯胡祖邪奔于父周易朱一字乞翼加並爲部落小帥周易朱性凶麤不爲羣胡所附勒壯健有膽略好騎射周易朱每使代已督攝部胡部胡愛信之并州刺史司馬騰執諸胡於山東賣充軍實兩胡一枷勒亦在中至平原賣與師氏爲奴師家隣於

馬牧勒與牧帥汲桑往來相託遂招集王陽鬱安支雄冀保吳豫
劉膺姚豹遠明郭敖劉徵劉寶張暄僕呼延莫郭黑略張越孔豚
趙鹿支屈六等東如赤龍騾驢諸苑乘苑馬還掠繒寶以賂汲桑
成都王穎之廢也穎故將陽平人公師藩等自稱將軍起兵趙魏
眾至數萬勒與汲桑率牧人乘苑馬數百騎以赴之於是桑始命
勒以石爲姓以勒爲名藩拜爲前隊督藩戰敗身死勒與汲桑亾
潛苑中穎之將如河北也汲桑以勒爲伏夜牙門率牧人劫掠郡
縣繫囚合軍以應之屯于平石桑自號大將軍進軍攻鄴以勒爲
前鋒都尉攻鄴尅之尋爲晉將苟晞所敗勒往從劉淵拜爲輔漢
將軍平晉王劉聰立以勒爲征東大將軍并州刺史汲郡公劉粲
攻洛陽勒留長史刁膺統步卒九萬徙輜重于重門率輕騎二萬
會粲於太陽大敗晉監軍裴逸于澠池遂至洛川勒出成臯圍晉

陳留太守王讚於倉垣爲譖所敗屯文石津將北攻晉幽州刺史
王浚會浚將王甲始率遼西鮮卑萬餘騎敗劉聰安北大將軍趙
固于津北勒乃燒船棄營引軍向栢門迎重門輜重合于石門而
濟南攻晉豫州刺史馮嵩于陳郡不剋進攻襄城太守崔廣於繁
昌斬之先是雍州流民王如侯脫嚴嶷等起兵江淮間受劉淵官
位聞勒之來也懼遣眾一酋拒於襄城勒擊敗之盡俘其眾勒至
南陽屯于宛之北山王如遣使通好勒進攻宛剋之斬侯脫降嚴
嶷盡并其眾南至襄陽攻剋江西三十餘壘有據江漢之志勒右
長史張賓以爲不可引軍而北晉太傅東海王越率洛陽之眾二
十餘萬討勒越薨於軍軍人推太尉王衍爲主率眾而東勒追擊
破之於苦縣勒分騎圍而射之相登如山殺王衍及晉襄陽王範
等十餘萬人越世子毗聞越薨出自洛陽從者傾城勒逆毗於洧

倉破之執毗及晉宗室二十六王并諸卿士皆殺之與王彌劉曜
攻陷洛陽歸功彌曜遂出轅轅執晉大將軍苟晞於蒙城以爲左
司馬劉聰授勒鎮軍大將軍幽州牧領并州刺史用張賓之計自
汝南葛陂北都襄國襲幽州擒王浚殺之劉聰加勒陝東伯得專
征伐封拜刺史將軍守宰列侯歲盡集上及劉粲爲靳準所殺勒
率眾赴平陽曜稱尊號授勒大司馬大將軍加九錫增封十郡并
前十三郡進爲趙公勒至平陽靳明出與勒戰勒大破之遣兼左
長史王脩主簿劉茂獻捷於曜明率平陽之眾奔曜曜西如粟邑
勒焚平陽宮室置戍而歸徙渾儀樂器於襄國曜遣使授勒太宰
領大將軍進爵趙王增封七郡并前二十郡出入警蹕冕十有二
旒乘金根車駕六馬如魏武輔漢故事王脩舍人曹平樂留仕曜
朝言於曜曰大司馬遣脩等來外表至虔內覘彊弱曜實殘弊懼

脩宣之大怒追還策命而斬王脩劉茂逃歸言脩死狀勒大怒誅曹平樂父兄夷其三族又知追停太宰趙王之授怒曰帝王之起復何常也趙王趙帝孤自取之名號大小豈爾所節乎勒乃自稱大都督大將軍大單于趙王以二十四郡爲趙國號爲趙王元年平文三年也勒遣使求和請爲兄弟斬其使以絕之自是朝會常僭天子禮樂以饗羣臣烈帝元年勒又遣使求和帝許之二年勒僭稱皇帝置百官年號建平雖都襄國又營鄴宮作者數十萬人兼以晝夜五年勒死子大雅僭立大雅名犯顯祖廟諱大雅立號年延熙石虎廢大雅爲海陽王而僭立尋殺之

虎字季龍勒之從子也祖曰匄邪父曰寇覓寇覓有七子虎第四勒父幼而子之故或謂之爲勒弟也晉永興中與勒相失永嘉五

年劉琨送勒母王氏及虎於葛陂時年十七矣性殘忍遊獵無度能左右射好以彈彈人軍中甚患之勒白母曰此兒凶暴無賴使軍人殺之聲名可惜宜自除也王曰快牛爲犢子時多能破車爲復小忍勿却之至年十八身長七尺五寸弓馬迅捷勇冠當時將佐親戚莫不敬憚勒深嘉之而酷害過差軍中有壯健與已齊者因獵戲謔輒殺之至於降城陷壘不復斷別善惡坑斬士女甚有遺類御眾嚴整莫敢犯者指授攻討所向無前故勒寵信彌隆仗以專征之任劉聰以虎爲魏郡太守鎮鄴三臺又封繁陽侯食邑三十戶勒爲趙王以虎爲車騎將軍加侍中開府進封中山公勒稱尊號爲太尉守尚書令封中山王食邑萬戶勒死虎擅誅右光祿大夫程遐中書令徐光遣子邃率兵入大雅宮直衛文武皆奔散大雅大懼自陳弱劣讓位于虎虎曰若其不堪天下自當有大

義何足豫論遂逼立之虎自爲丞相魏王虎以勒文武舊臣皆補丞相閑任其府寮舊昵悉居臺省禁要改勒太子宮曰崇訓宮徙勒妻劉氏已下居之簡其美淑及車馬服御皆歸虎第劉氏謂其彭城王石堪曰丞相便相凌蹈恐國祚之滅不復久矣真可謂養虎自殘者也王將何以圖之堪曰先帝舊臣皆以斥外眾旅不復由人宮殿之中叵所厝計臣請出奔兗州據廩巨扶南陽王恢爲盟主宣太后詔於諸牧守征鎮令各率義兵同討惡逆蔑不濟也劉氏然之旣而堪計不果虎衆而殺之又殺劉氏石生先鎮長安石朗鎮洛陽並起兵討虎爲虎所滅虎遂自立爲大趙王號年建武自襄國徙居於鄴乃殺大雅及其母程氏并大雅諸弟初虎衣袞冕將祀南郊照鏡無首大恐怖不敢稱皇帝乃自貶爲王使其太子遂省可尙書奏事唯選牧守祀郊廟征伐刑斷乃親覽之虎